

125 ons Società da musica, Sent

[Home](#) [Die Landschaft](#) [Das Dorf](#) [Organisation](#) [Wirtschaft](#) [Veranstaltungen](#) [Vereine](#) [Aktuell](#) [Suchen](#)

125 ons Società da musica Sent



cronica 1879 - 2004

compilada dad Armon Nuotclà

125 ons bain motiv avuonda da fermar per ün mumaint nossa cuorsa da minchadi, da laschar noss pissers e strapatschs chi stettan e da pensar davo che cha quai voul vairamaing dir.
 125 ons far musica our da plaschair
 125 ons allegrar ad otra gliעד fond musica
 125 ons quai sun 6 generaziuns chi han sunà illa musica da Sent.

Stimats preschaints

Cur ch'eu n'ha survgni l'incumbensa da far üna cronica per la Societá da musica Sent, schi n'haja savü bel e da prüma chi nu sarà pussibel d'accumplir quista lezcha propcha bain, siand chi nu sun avantman ils documaints necesaris plü vegls.

Aint il cudesch da protocols cumanzà dal 1963 esa scrit sülla prüma pagina:

Per suprazanzas venturas: ils cudeschs vegls da protocol sun svanits tanter plattas chodas.

Uschè nu possedaina ingüns cudeschs da protocols avant l'on 1963. Per pudair accumplir mia incumbensa n'haja stuvü am basar be sün las fotografias veglias ramassadas da Jon Dumenic Vital aint il cudesch d'or e dad interpretaziuns e comentars dals pacs musicants vegls chi vivan

amo: Mario Nogler, Jachen Zisler, Jacob Lansel, Reto Luppi, Plasch Jann, Men Lansel, Artur Fried.



Cumün vegl avant il 1900

Il plü vegl documaint chi cumprova chi existiva üna „musica“ a Sent es quista fotografia chi datescha ca. dal 1880.



ils musicants sün quist putret sun: in pè da schnester: Armon Muos-cha, Ans Ans, Jöri Felix, Not Pult; in sezzas da schnester: Joannes Bischoff, Vonesch, Chasper Ans, Bergamin

Schi tuorna l'on 1880, cur cha quista fotografia es gnüda fatta, schi as poja partir dal fat cha quists 8 musicants varan sgüra sunà insembel almain ün on avant, nempe dal 1879. Eir els varan gnü d'imprender a sunar lur instrumaints. I dà in ögl be instrumaints da tola.

Pels prossems 21 - 22 ons nu dudina e nu vezzaina nüglia da nossa musica. Chi sun però stats activs nun esa da's dubitar. Dal 1910 as partecipeschna a la festa chantunala a Tusan cun 16 commembers e quai in prüma categoria, insembel cun San Murezzan, Filisur, Bonaduz, Landquart e'ls cadets da la scoula chantunala.



Sün quist purtret vezzaina: Jacob Benderer, Peder Ruben, Peder Bassin, Men Poo, Peder Fried, Andrea Koch, Jon M. Caviezel, Jon Baumann, Jachen Werro, Barnabà ed Otto Fontana, Joannes Bischoff, Richard Frigg, Linard Guler, Töna Brunold, Peider Cantieni dirigent e bassist. I'ns dà in ögl 2 clarinettas. Inplü ils duos bass nomnats helicons, instrumaints pratics per portar chi han servi amo blers ons a nossas musicas.

Dal 1913 as partecpescha la musica a la festa chantunala a Samedan e dal 1920 a quella da Filisur.



Filisur 1920; dirigent culla valisch es Peder Ruben

Dal 1931 esa stat a Sent la festa d'uffants. La musica as partecpescha al cortegi tras cumün.



Avertüra da la festa a Stron



La festa districtuala da musica a Ramosch intuorn il 1940. Sco dirigent va ouravant Dumenic Mathieu. Forsa ha'l be güdà oura??

A Domat Ems esa stat dal 1937 la festa chantunala, a la quala ils Sentiners as partecipeschan.

Als 23 avrigl dal 1939 ha manà tras la musica da Sent üna festa da musica, probabel districtuala. 11 musicas as han partecipadas.



Pronts pella concorrenza da marchar; dirigent: Chasper Sarott



Toc da gara da la musica da Sent (1939)

Il pled festiv ha tgnù sar dr. Jon Pult barmör in rumantsch e dal rapport general dals experts resorta il fat chi vegna tschernü sco tocs da gara cumposiziuns massa pretensiusas.

1939 - 1945: La segunda guerra mundiala impedischa ün'attività regulara. I sarà gnü sunà be pac causa il servezzan activ.

Dal 1947 as partecipescha la società per la festa chantunala a Scuol illa 3. categoria. Els tuornan cul prüm rang, insembel cun Ardez, Mustèr, Vaz Sura e Zernez.



Prouva principala pella festa a Scuol. Il mattet be uraglia davantvart es Men Valentin

Dal 1953 as partecipescha la musica da Sent a Ramosch ad üna festa dal district.

No rivain pro l'on 1958

L'on 1958 es stat per la musica da Sent ün on important. Fingià lõnch as discurriva d'ün'unifuorma nouva. Fin intant s'haja dovrà be unifuormas veglias, regaladas da societats sù da la Bassa, o dafatta chi's vaiva be ün chapè. Id es gnü fuormà ün comitè chi vaiva da stübgjar la fatschenda e gnir cun propostas. Bain svelt d'airan qua duos propostas e cun quellas eir duos partidas. Il comitè propuona da cumprar ün'unifuorma convenzunala, dirigent Reto Luppi vezzess plü jent il custüm grischun: chotscha, tschop e chapè nair, chamisch'alba, brastoc cotschen..... Unifuorma o custüm??? Quai es la gronda dumonda. La votumaziun ha manà al resultat a favur dal custüm cun üna vusch differenza. E quia amo ün'anecdota: Per la munaida vaiva pisserà il parti da l'unifuorma ed ün temp a la lunga esa gnü sunà a las prouvas separadamaing, üna saira parti custüm, üna saira parti unifuorma.

Insomma, la decisiun dal 1958 es statta pel avegnir da nossa società fich importanta. La società ha pudü tour part in seguit a numerusas festas da custüms: giò'l Tessin, Val Gardaina, Meran, film da Heidi a Guarda, film Viamala, Basilea, Expo 1964, Domat, Turich, Basilea e l'Olma.



La musica da Sent cul nouv custüm 1958



Cortegi tras cumün 1958

Implü esa stat fin hoz simpel da's decider cur chi'd es da rizzar üna unifuorma nouva. Quai es capità dal 1974 e dal 1998. Che cumpraina? No restain vi da nos custüm.

I s'ha lura organisà dal 1958 üna festa d'inauguraziun dals custüms e cumbinà quella culla festa d'uffants.



Toc general cullas musicas invidadas a l'inauguraziun



Dirigent Reto Luppi 1958



Festa da custüms a Meran



Festa da custüms a Basilea



Registraziun dal film da Heidi a Guarda; dirigent: Reto Luppi

Quai chi riguarda il film da Heidi tut sù a Guarda: da princip d'eira gnù giavüschà la musica da Sent pervi dals custüms (purtret). Per finir hana lura dovrà eir la part musicala culla marcha da Chalavaina dad Otto Barblan, sunada dals Sentiners.

Dal 1965 s'inscuntra la musica da Sent cun noss vaschins ad Ischgl. Il viadi ha d'ürà quatter dis invezza da duos (anecdota Plasch Jann)



1966 Festa districtuala ad Ardez

1967 - 1971:

Culla musica vaja ün pa sü e giò. Müdamaint da dirigent, sparmals, sortidas.



Rico Falett ha miss in pè cun üna gronda part dals scolars ün chant avert. Quia la gruppa dals instrumaints da tola.

Dal 1972 es la festa chantunala a Samedan. La musica da Sent as partecipescha cun instrumaints novs e tuorna cul cranz d'or.



Concurrenza da marchar a Samedan, dirigent: Anton Erni

I seguan ons da grond'actività. Quia ils fats ils plü importants:

1973 Emischun culla televisiun ad Andermatt

1974 Festas da custüms a Domat e Turich.



Viadi a Heidelberg



1975 Festa chantunala Planüra da Lantsch, tuornats cul prüm rang



1976 Cooperaziun a la festa districtuala da chant a Sent



Festa districtuala a Müstair

1977 Viadi a München, per pacas pers nos char binderal Peder Bazzell



1979 Festa chantunala a Klosters, prüm rang; dirigent: Anton Erni



1980 In schner perdaina a nos paschiunà dirigent Anton Erni. El dirigia per l'ultima jada nossa musica oura Stron al Silvester dal 1979.



Concert da Pasqua 1980



festa da giubileum da 100 ons, 1980



festa da giubileum da 100 ons, 1980, salüd dal president chantunal Ch. Cabalzar



Basilea „Grün 80“; dirigent: Jachen Erni

1983 Festa chantunala a Flem, 2. categoria, 1. rang, dirigent: Jachen Erni

1984 Festa da musica a Ftan, giubileum 75 ons



1985 Festa districtuala Zernez; binderal: Georg Koch



Cuits 1985



1987 Festa chantunala San Murezzan, 2. categoria, 1. rang, dirigent: Mario Oswald



1989 Emischiun TV direct da Sent ; dirigent: Mario Oswald



1990 Viadi a Biberehren

1991 Festa districtuala a Scuol



1992 e 1993: tschainas da gala a Silvester



1995 Festa districtuala a Puschlav; dirigent: Hans Neuenschwander



1996 Di dal god Val d'Uina



1997 Festa chantunala a Tavo; dirigent: Tumasch Melcher



Viadi Altenrhein SG



2000 Il Niclaus ans avertischa da far da bravs e da frequentar diligiaintamaing la prouvas.

2001 Festa districtuala a Müstair, dirigent: Ernest Vital



concert da Pasqua 2002; dirigent: Ernest Vital



Viadi ad Ischgl; Ils duos capos da Sent ed Ischgl, tuots duos musicants, chi per üna jada nu discorran da la politica.



2003 Festa da giubileum Sa. Maria, dirigent: Mario Oswald



2004 Nossa musica actuala

Festas da musica

Tenor mias retscherchas ha la società tut part ad 11 festas chantunalas ed a 13 festas districtualas. Quantas prouvas, fadias e tremblarölas varà quai cuostü?

Festas da god

Uen oter tema, degn da gnir manzunà, füssan las numerusas festas da god. Glied plü veglia s'alorda sgüra da quellas oura Suot Crusch, aint a Plan da Porchs, plü tard giò Sur En. Diversas jadas saran stats ils musicants e lur confamiliars ils melder e forsa eir ils unics giasts. Il rechav d'eira pel solit pitschen, mettend in relaziun cun la lavur prestada.

Dirigents

Eu less nomnar ils differents dirigents chi han dirigi la musica da Sent:

Cla Genua, Tòna Brunold, Peider Cantieni, Robert Cantieni, Jon Planta, Peder Ruben, Jachen Werro, Chasper Sarott, Reto Luppi, Anton Erni, Jachen Erni, Mario Oswald, Otto Huber, Hans Neuenschwander, Tumasch Melcher, Ernest Vital e darcheu Mario Oswald.

Malavita nu possa quintar sù tuot ils presidents ed ulteriurs commembers da las suprastanzas d'ürant 125 ons. Eir quels han prestà gronda lavur, üna lavur chi merita ün grazcha fich.

Stimats preschaints,

davo avair vis tuot quistas fotografias e dudi quista cronica, sarat da l'avis cha'l böt pricipal da nossa società saja quel da's divertir a festas e viadis etc. Na sgüra brich! Quai sun stats be documaints chi sun avantman, sco ch'eu n'ha fingià manzunà al cumanzamaint.

Eu sun però persvas, cha daspö chi exista nossa società, es il böt principal amo adüna quel dad esser activ in cumün, imbellind ils differents evenimaints chi succedan regular- ed irregularmaing.

Concerts in cumün e fracziuns, cuvits, mastralias, Silvester, concerts in baselgia, nozzas, anniversaris ed oter plü.

No frequentain ca. 60 prouvas l'on, ingiò cha no'ns preparain musicalmaing per accumplir nossa nöbla lezcha.

Sainza paschiun e plaschair per la musica, sainza perseveranza ed idealissem nu füss nossa da musica 125 ons veglia. Sperain cha eir in nos temp modern, be furias e buolà da fusiuns e centralisaziuns, possa nossa musica exister inavant, ch'ella possa allegrar a vegl e giuven.

Perquai eschan fich grats a tuot quels chi'ns sustegnan inavant, in qualsia möd.

Grazcha fich per voss'attenziun.

Armon Nuotclà